

景定建康志卷之十五

承直郎宜差充江南東路安撫使司幹辦公事周應合修纂

志總序

倚相讀九丘史遷作八書丘以州別故九書以類從故八班固志而十之丘與書之法備焉志者識也後皆因之元和有郡縣志元豐有九域志天下郡縣各有志此建康志所由作也建康爲 今留都視它郡尤重今考其地自有城邑以來千七百年間因革凡幾爲城爲邑爲州爲府爲郡爲國爲都其治不同也

建康志卷十五

一

曰金陵曰江乘曰秣陵曰建鄴曰丹陽曰江寧曰昇曰建康其名不同也或置州刺史或置郡太守或置府尹或建帥閫或建大都督行臺或建節鎮或封侯王其制又不同也至於山川之形勝風物之表著興君誼辟之代見忠臣烈士之世出盛衰得失之可示勸戒者豈一簡所能盡哉於是彙而輯之爲志凡十
一曰疆域二曰山川三曰城闕四曰官守五曰儒學六曰文籍七曰武衛八曰田賦九曰風土十曰祠祀屬辭比事其目各著于篇

疆域志一

金陵古揚州之域在周爲吳春秋末屬越楚滅越併有其地始名金陵秦兼諸侯置郡縣屬鄣郡改秣陵漢興封韓信爲楚其後更封諸王荆吳江都是也武帝初置刺史屬丹楊郡後漢因之建安十六年孫權自京口徙治秣陵明年改爲建業晉武平吳以爲丹楊郡及揚州刺史治建興初改爲建康元帝渡江都焉以宰相領揚州改丹楊太守爲尹宋孝武分浙江東爲東揚州以揚州爲王畿尋復舊歷齊梁陳咸都

建康志卷十五

二

於此隋平陳廢丹楊郡立蔣州於石頭大業初復置丹楊郡唐武德二年爲揚州東南道行臺尙書省七年復蔣州罷行臺爲揚州大都督府九年州徙治江都以其地屬潤州正觀七年復爲揚州治所至德二載析置江寧郡乾元元年改昇州兼置浙西節度使上元二年州廢爲上元縣大順元年復置昇州天祐二年僞吳大城昇州建大都督府武義二年改爲金陵府天祚三年封徐知誥齊王建西都改江寧府晉天福二年李昇僭位國號唐

皇朝開寶八年復爲昇州天禧二年陞江寧府建康軍節度建炎三年

車駕南渡詔改建康府紹興七年駐

蹕明年置留守古稱金陵帝王之宅東南形勝之地大略可考自秦之南遊隋之平陳將以厭其氣而析其地也然孫權據吳會以鼎峙晉元渡江實爲王畿宋齊梁陳因以有國其間從事河洛規取中原幾致混一累朝衣冠禮樂號爲中國正統吳唐割據經營規畫用力勤矣識者謂開

聖人創垂之業而成 恢復之功者實基於此稽之前代因革分合名號靡常蓋自禹貢以迄于今爲都者七爲治所者十有一爲國者六爲州者五爲府者三爲郡十有四而僑置者九爲縣十有九廢併者十僑寓者四今屬於府者五類而辨之作疆域志

地爲都

孫吳建都四世凡六十年東晉建都十一世凡一百三年南宋建都八世凡五十八年南齊建都七世凡二十三年蕭梁建都四世凡五十五年南陳建都五

世凡三十三年

吳志及
南史

吳志張紘謂孫權曰秣陵楚成王所置名爲金陵地勢岡阜連石頭昔秦始皇東遊會稽經此縣望氣者云金陵地形有王者都邑之氣故掘斷連岡因改名秣陵今處所具存地有其氣天之所命宜爲都邑權善其議未能從也後劉備東宿秣陵因觀地形亦勸權都之權曰智者意同遂都焉又獻帝春秋劉備至京謂孫權曰吳去此數百里卽有警急赴救爲難將軍有意屯

建康志卷十五

四

京乎權曰秣陵有小江百餘里可以安大船吾方理水軍當移據之備曰蕪湖近濡須亦佳權曰吾欲圖徐州宜近下也諸葛亮亦曰鍾阜龍盤石城虎踞眞帝王之宅晉溫嶠議遷都豫章三吳之豪請都會稽二論紛然未有所適王導曰古之金陵舊爲帝里孫仲謀劉元德皆言王者之宅由是不行蓋吳以來將欲經營四方未嘗不以此爲根本云 六朝事迹云南朝建都之地不過建康京口豫章江陵武昌數處其疆

弱利害前世論之詳矣吳孫策以會稽爲根本
大帝嗣立稍遷京口其後又嘗住公安又嘗都
武昌蓋往來其間因時制宜不得不爾及江南
已定遂還建鄴保有荆揚而與魏蜀抗衡其宏
規遠略晉宋而下不能易也故孫皓捨建鄴而
之武昌吳因以衰梁元帝捨建鄴而守江陵梁
遂以亾李嗣主捨建鄴而遷洪府南唐遂不能
以立王導斷然折會稽豫章之論而以建鄴爲

根本自晉而下三百年之基業導之力也

孫皓
議遷

建康志卷十五

五

都武昌陸凱上疏曰武昌土地危險非王都安
國養民之處船泊則沉漂陵居則峻危蘇峻
之亂溫嶠議遷豫章三吳之豪請都會稽二論
紛紜未有所適王導曰古之金陵聖皇所居孫
仲謀劉元德皆言王者之宅古之帝王不以豐
儉移都由是嶠等之議不行齊蕭穎胄議遷
夏口柳忱以巴峽未實不宜輕捨根本搖動人
心帝不從俄而巴東之兵至峽口遷都之議遂
息梁元帝臨荆峽二十年情所安戀不欲歸
建鄴故府臣僚皆楚人並欲都江陵周洪正諫
曰士大夫言聖王所都本無定處若黔首未見
入建鄴便謂猶列國諸王今日副百姓心不可
不歸建鄴謂猶列國諸王今日副百姓心不可
都官舍軍壘十不容其一二自公卿下至軍士
莫不
思歸
我

宋中興留都有錄已見書首

地爲治所

越築城治長千里**楚**置金陵邑治石頭**秦**改爲秣陵
縣治**後漢**分揚州置吳郡治建業建安十六年孫權
自京口徙治秣陵明年又城石頭改秣陵爲建業吳
既克關羽都武昌以呂範領丹楊太守治建業永安
中分溧陽以北六縣爲丹楊郡仍治建業**晉**武帝平吳
以爲丹楊郡及揚州刺史治太康三年分淮水北爲
建業南爲秣陵更置江寧縣**宋**孝武以揚州爲王畿
尋復舊爲都見前**隋**平陳廢丹楊郡置蔣州治石頭
此不重述

建康志卷十五

六

唐武德二年爲揚州東南道行臺置尚書省八年爲
揚州大都督府貞觀七年復爲揚州治所至德二載
改爲江寧郡治所乾元以後改爲昇州治所仍置節

鎮

寰宇記云天寶末明皇以金陵自古雄據之地
祿山方亂不可以縣統之乃置昇州加節制

上

元二年復廢爲上元縣光啟三年還爲昇州治所仍
置節鎮天祐二年僞吳楊行密大城昇州建大都督
府其子溥改爲金陵府治**石晉**天福二年建西都改
爲江寧府治李昇僭位號**南唐**因卽居之至我

聖宋初平江南置昇州治天禧二年改爲江寧府治

建炎三年改爲建康府治紹興三年以府治建爲
行宮遷府治於 行宮之東南隅詳見城闕志
中興以來江東安撫司沿江制置司淮西總領所江
東轉運司江淮提領所江淮都督府皆治于此詳見
官守志

地所屬分埜

兩漢地理志吳地斗分埜隋地志自斗十二度至女
七度爲星紀周禮保章氏注星紀吳分埜通典曰在
天官於斗則吳之分野晉永嘉中歲星熒惑太白聚
牛女之間識者以爲吳越之地當興王者是歲元帝
登寶位故史臣曰星斗呈祥金陵表慶苻堅會羣臣
謀南寇石越對曰今歲星鎮斗牛福德在焉垂象弗
差苻融曰歲鎮在斗牛吳越之福不可伐此其大略

地所屬國名

吳國在周屬吳太伯之國有固城在溧陽溧水兩縣
之間卽吳所築也夫差爲越所滅至漢高祖時以丹
陽會稽豫章三郡五十三城立兒子濞爲吳王景帝
時國除東漢末以其地封孫策爲吳侯弟權襲之曹

操封爲吳王三國鼎峙吳亦稱帝因都焉詳見

越國越本夏少康之後封於會稽元王四年用范

蠡計滅吳盡有其地築城于此以謀吞楚詳見致貢

於周元王賜胙命爲伯越兵橫行江淮號霸王後七

世爲楚所滅

楚國周成王時初封熊繹于丹陽乃在荊州非此所

謂丹楊也其後國寔疆地寔廣至威王時滅越盡有

吳越之地置金陵邑於石頭詳見及懷王末項羽自

稱楚秦滅楚以此地置鄣郡詳見至漢高帝時封

建康志卷十五

韓信於楚鄣郡屬焉六年廢

荊國漢高帝六年羣臣請以故東陽郡鄣郡吳郡立

劉賈爲荊王是年黥布反失國

江都國漢景帝旣誅吳王濞徙汝南王劉非爲江都

王治故吳國至其子建國除後以其地置郡

昇國皇朝天禧二年封壽春郡王爲昇王嘉祐四年

翰林學士胡宿言 陛下建國於昇猶次列國非所

以重始封之地宜進昇爲大國無得封從之 國朝

會要大國二十有四昇其一也

地所屬州名

揚州禹貢北距淮東南據海皆揚州之域唐虞置揚州牧至漢武帝初置揚州刺史後漢因之分揚州之半置吳郡治建業後以封孫氏晉太康元年平吳徙治建業惠帝元康初有司奏揚州疆土曠遠統理尤難於是割七郡置江州元帝渡江都揚州統丹楊吳郡宋孝武分浙江東五郡爲東揚州治會稽而揚州仍領丹楊等十五郡大明三年以揚州所統六郡爲王畿以東揚州爲揚州八年復舊景和元年罷東揚州隋徙揚州治江都置大督府以句容延陵曲阿等縣屬焉大業中廢唐武德二年河間王孝恭平輔公柝以江寧溧水丹楊溧陽安業復置爲東南行臺尙書省治江寧七年廢尋復爲大都督府領上元金陵句容丹楊溧水溧陽凡六縣九年徙治江都正觀七年復舊至德中復治江都秦觀揚州集序云漢刺史無常治後之稱揚州者指其所治而已

義州晉元帝置陳大建元年廢爲建興郡領建安同夏烏山江乘臨沂湖熟凡六縣

蔣州隋平陳廢丹楊郡於石頭立蔣州唐武德二年廢七年復置於金陵縣尋廢

昇州唐乾元元年以江寧郡改置昇州顏真卿嘗以昇州刺史兼浙西節度使上元二年廢光啟三年復置天祐二年僞吳封徐溫齊公大城昇州武義二年改金陵府 皇朝開寶八年復置天禧二年改爲江寧府

茅州唐初置領琅邪金山縣後廢武德三年以句容延陵復置七年廢

地所屬郡名

故鄣郡秦置漢元封二年更名丹楊郡吳永安中以蕪湖以南十三縣復爲故鄣治宛陵

丹楊郡漢置治宛陵志云領宛陵於晉江乘春穀秣陵故鄣句容涇丹楊石城湖熟陵陽蕪湖黟溧陽歙宣城凡十七縣後漢因之建安十三年孫權分爲新都郡二十六年權始置丹陽郡自宛陵治建業領縣十九永安中分置故鄣郡丹陽所領惟溧陽以北六縣晉太康元年改建業復爲秣陵宋齊間分丹楊立

毗陵郡丹陽所領惟建康秣陵丹楊江寧永世溧陽湖熟句容八縣隋平陳廢大業初復置領江寧溧水以當塗來屬割延陵句容等縣屬江都唐初廢爲州天寶元年復置領丹徒丹楊延陵句容江寧金壇凡六縣至德二載析置江寧郡

建興郡陳太建元年以義州南瑯琊彭城郡地置領建安同夏烏山江乘臨沂湖熟凡六縣屬揚州

江寧郡唐至德二載以潤之江寧句容宣之溧水溧陽置乾元元年改昇州

義興郡晉永興中以丹陽之平陵永世及割吳興郡置四縣立義興郡以賞周玘創義之功屬揚州

地所置僑郡名

淮南郡本秦九江郡漢立淮南王國後爲郡晉治壽春成帝初蘇峻祖約作亂於江淮胡寇南侵淮南百姓南渡者轉多於是僑立淮南郡以處之領蕪湖繁昌當塗浚遒定陵襄垣凡六縣宋大明六年以淮南故郡併宣城八于姑孰隋廢以當塗屬丹陽更於壽春置

南琅邪郡晉元帝於江乘之金城立琅邪郡屬揚州領臨沂陽都及懷德三縣在舊江寧縣東北五十里成帝咸和六年復琅邪比漢豐沛宋大明四年以郡隸王畿五年行幸琅邪郡原遣囚繫陳大建元年廢爲建興郡

魏郡廣川郡高陽郡堂邑郡四郡並咸康四年僑置并所統縣並寄居京邑

南東海郡南東平郡南蘭陵郡晉元帝以江乘置四郡穆帝時以南東海七縣出居京口

地所置府號

金陵府僞吳武義二年改昇州爲金陵府大和五年僞吳建都金陵尋罷天祚三年封徐知誥爲齊王建爲西都改江寧府

江寧府天祚三年改金陵爲江寧府石晉天福二年李昇建國僞號唐

皇朝開寶八年改昇州天禧二年以昇州爲江寧府置軍國建康命壽春郡王爲府尹建炎三年改建康府

建康府建炎三年五月丙戌詔改江寧府爲建康府
節鎮舊號如故

地所統縣名

存者
丹之

上元次赤縣唐上元二年廢昇州以江寧地置屬潤
州後廢寶應元年復置光啟三年置昇州屬焉通鑑
云大順元年置昇州於上元縣以張雄爲刺史縣初
仍江寧舊治白下村光啟中徙鳳臺山西寰宇記云
國朝遷南唐司會府今府治之東 御前後軍營是
其地建炎徙今治在城東隅距 行宮纔一里

建康志卷十五

十三

江寧次赤縣

臨江歸化
金陵白下

晉太康元年分秣陵置臨江
明年改江寧後廢永嘉中復置隋併秣陵建康同夏
地入焉大業初屬丹陽郡唐武德三年卽縣置揚州
更名曰歸化七年號金陵屬蔣州明年徙白下村稱
曰白下屬潤州正觀七年復名歸化九年復爲江寧
至德二載置江寧郡而縣廢乾元元年復置屬昇州
上元二年州廢以其地置上元縣南唐割上元南十
九鄉當塗北二鄉因舊名復置隸金陵府圖經云古
縣治南臨浦水在城西南七十里實錄云南唐在州

城西偏西卽吳冶城東臨運瀆今天慶觀東卽其地
國朝移郭下在城西北距行宮三百步輿地廣記
云唐旣改江寧爲上元南唐復析上元置江寧分治
郭下

句容次畿縣漢置屬丹楊郡有句曲山其形如句字
因以名縣漢武帝封長沙定王子黨爲句容侯國除
復爲縣吳赤烏八年使校尉陳勲發屯兵三萬鑿句
容中道至雲陽西城以通吳會船艦唐武德二年於
縣置茅州七年州廢屬蔣州九年隸潤州會昌四年
升望縣乾元元年屬昇州上元二年州廢屬潤州光
啟三年復置昇州縣隸焉

國朝因之縣治在府東九十里晉毛寶傳燒蘇峻句
容積聚峻頗乏食晉桓修傳王恭將伐南譙王尚之
遣何澹之向句容修與輔國將軍陶無忌距之修至
句容而恭敗唐武德五年李靖討輔公柘兵先至丹
楊公柘大懼棄城東走李世勣追之公柘至句容兵
能屬者纔五百人

溧水次畿縣隋開皇中析溧陽丹楊置屬蔣州大業

初屬丹陽郡唐上縣武德三年屬揚州九年屬宣州
乾元元年屬昇州上元二年昇州廢屬宣州光啟三
年復置昇州縣屬焉

國朝因之縣治在府東南一百二十里唐武德二年
杜伏威遣行臺左僕射輔公祐攻李子通渡江攻丹
楊克之進屯溧水龍紀二年孫儒盡舉淮南之衆濟
江前軍至溧水楊行密使李神福拒之又行密傳大
順二年孫儒屯溧水行密遣李_裊屯廣德皆此地也

溧陽次畿縣秦置溧水所出南湖也漢初屬江都元

封中屬丹楊郡前漢封梁敬王子欽後漢封陶謙皆
爲溧陽侯吳省爲屯田志云封潘璋爲溧陽侯又云
孫皓封孫蔣爲溧陽侯晉太康元年復置分爲永平
隋開皇十八年併入溧水唐武德三年析江寧溧水
復置隸揚州九年隸宣州乾元元年屬昇州明年屬
宣州尋復上元元年又屬宣州未幾又復寶應元年
屬宣州光啟三年復屬昇州

國朝因之舊治在溧水縣東南九十里天復三年移
治今所在府東南二百四十里通典漢舊縣子胥奔

吳乞食之所卽此溧陽也元和郡國志溧水在溧陽縣南六里

秣陵縣

金陵
建業

更治所凡六楚威王以其地有王氣埋

金鎮之號曰金陵秦始皇改爲秣陵屬鄣郡建康實錄云秦縣城在舊江寧縣東南六十里秣陵橋東北漢屬丹楊郡武帝封江都王子纏爲秣陵侯後漢復爲縣孫權自京口徙治改曰建業晉太康元年復爲秣陵三年分淮水北爲建業南爲秣陵宋書云縣治去京六十里今故治村是也義熙中移於鬪場柏社

實錄云在江寧縣東南度長樂橋古丹楊郡是也元熙元年省揚州禁防參軍縣治移其處圖經云在宮城南八里一百步小長千巷內梁末北齊軍於秣陵故城跨淮立橋柵當是其地隋併入江寧景德二年置秣陵鎮今在江寧縣東南五十里

建業縣晉書太康三年分秣陵淮水北爲建業建興初避帝諱改建康縣舊有城在吳冶城東實錄云縣治在故都城宣陽門內古御街東寰宇記云咸和六年徙出宣陽門外御街西建初寺門路東是也隋省

入江寧

江乘縣秦置方輿志云始皇登會稽從江乘還過吳漢屬丹楊郡王莽曰相武後漢復舊吳省爲典農都尉晉武帝復置咸康七年析南境爲臨沂屬琅邪郡陳大建元年屬建興郡南史鄭襲嘗爲令

丹陽縣漢元朔初封江都王子敢爲丹楊侯後漢爲縣晉封孫韶丹楊侯南朝復爲縣隋廢武德二年析江寧溧水復置屬揚州正觀七年省入當塗天寶元年復置縣屬丹楊郡非舊地矣

湖熟古縣名漢屬丹楊郡武帝封江都王胥行爲湖熟侯一云姑孰後漢亦爲侯國吳省爲典農都尉晉武復置陳屬建興郡漢興平二年孫策攻揚州轉攻湖熟江乘晉蘇峻之亂毛寶燒句容湖熟積聚義熙九年罷臨沂湖熟脂澤田以賜貧人宋元嘉二十二年浚淮起湖熟廢田千餘頃二十八年徙越流人淮南流人於姑孰皆此地元和郡國志云在舊江寧縣東南七十里今在上元縣丹陽鄉去縣五十里淮水北古城猶在

永平縣

永 永
世 安

漢元封中置屬丹楊郡尋廢吳分溧陽復置改曰永安孫休封弟謙爲永安侯孫皓封孫洪爲永平侯晉武又改永世惠帝分置平陵并永世凡六縣屬義興郡尋復舊名宋省入溧陽

平陵縣詳見吳固城下今廢

安業縣唐武德二年析江寧溧水置今廢

同夏縣梁武帝生於秣陵同夏里大同元年因以置縣陳屬建興郡隋省入江寧圖經云縣東十五里有同夏浦舊有城今上元縣長樂鄉是其地

建康志卷十五

十八

臨沂縣本徐州琅邪國縣晉咸康七年分江乘西界僑置屬南琅邪郡陳屬建興郡吳蔡靚諸葛恢梁孟智陳明仲璋皆嘗爲令實錄云縣城在京江獨石山西臨大江在舊江寧縣北四十里南徐州記云縣有落星山屬慈仁鄉去縣四十里今上元縣長寧鄉攝山之西白常村蓋其地距上元縣三十八里

懷德縣

賈

晉大興元年琅邪國人隨帝渡江者幾千戶立懷德縣以處之屬丹楊郡永復爲湯沐邑後屬琅邪郡其地寄建康北境實錄云縣城在宮城南七

里建初寺前路東後改曰費移於宮城三里西北耆
閣寺西宋元嘉十五年省入建康臨沂古跡編云費
縣其琅邪分界於潮溝村在縣北九里今在上元縣
鍾山鄉

卽 **丘** **縣** 本晉琅邪國縣元帝置屬南琅邪郡宋元嘉
八年省入陽都

陽都 **縣** 本漢城陽國縣後漢改爲琅邪國晉廢元帝
置屬南琅邪郡宋大明五年省入臨沂

地所接四境

建康志卷十五

十九

建康府 東西二百三十五里南北四百六十里 **東** 至
本府界首一百四十里自界首至鎮江府四十里 **西**
至本府界首一十里自界首至和州八十三里 **南** 至
本府界首二百四十里自界首至寧國府一百二十
里 **北** 至本府界首四十九里自界首至眞州一百一
十里 **東南** 到本府界首二百八十五里自界首至常
州一百八十五里 **西南** 到本府界首九十里自界首
至太平州三十里 **東北** 到本府界首一百三十五里
自界首至鎮江府四十五里 **西北** 到本府界首二十

二里自界首至眞州一百二十七里自府界到東京陸路一千四百四十五里水路一千七百七十里到西京陸路一千八百里水路二千一百九十五里

上元縣附郭東西九十五里南北八十五里**東**至句容縣界八十里以周郎橋中分界**西**至江寧縣界一里以御街中分爲界**南**至江寧縣界七十里以永豐鄉北白米湖爲界**北**至眞州六合縣界四十九里以瓜步大江中流爲界**東南**到句容縣界七十里以東陳村爲界自界首到句容縣三十五里**西南**到江寧縣界四里以大隱鄉爲界**東北**到句容縣界六十里以章橋爲界自界首到句容縣八十里**西北**到眞州六合縣界二十九里以湖熟大江中流爲界自界首到六合縣八十五里

江寧縣附郭東西八十五里南北九十八里**東**至上元縣界一里以御街中分爲界**西**至和州烏江縣界四十里以鰻鰲洲大江中流爲界自界首至烏江縣一十五里**南**至溧水縣界九十三里以烏剎橋爲界自界首至溧水縣四十五里**北**至上元縣界五里以

金陵鄉爲界**東南**到句容縣界七十里以湖山鄉爲界自界首到句容縣九十里**西南**到太平州當塗縣界一百六里以章公塘爲界自界首到當塗縣一十七里**東北**到上元縣界二十五里以崇禮鄉爲界**西北**到上元縣界五里以金陵鄉爲界

句容縣東西七十里南北一百二十里**東**至鎮江府丹徒縣界五十里以山口爲界自界首至丹徒縣五十里**西**至上元縣界二十里以周郎橋中分爲界自界首至上元縣七十里**南**至溧水縣界六十里以丁

塘村爲界自界首至溧水縣三十里**北**至眞州揚子縣界七十里以下蜀大江中流爲界自界首至揚子縣六十里**東南**到鎮江府金壇縣界六十里以茅山崇元觀西堆爲界自界首到金壇縣六十里**西南**到江寧縣界七十里以上義山東綠楊村爲界自界首到江寧縣九十里**東北**到丹徒縣界六十五里以左橋爲界自界首到丹徒縣四十五里**西北**到上元縣界八十里以東陽鎮霸橋爲界自界首到上元縣六十里

溧水縣東西八十二里一百三步南北一百五十五里三十八步**東**至句容縣界三十七里以浮山頂爲界自界至句容縣四十里**西**至上元縣界三十五里以烏石橋爲界自界至上元縣八十五里**南**至寧國府宣城縣界一百一十里以四牌岡爲界自界至宣城縣一百三十里**北**至江寧縣界四十五里以上義山爲界自界至江寧縣七十五里**東北**到句容縣界四十里以望湖岡爲界自界到句容縣五十里**東南**到溧陽縣五十里以分界山爲界自界到溧陽縣七

十里**西南**到寧國府宣城縣界一百三十五里以崑山鄉爲界自界到宣城縣一百里**西北**到江寧縣界四十五里以烏剎橋爲界自界到江寧縣七十五里**溧陽縣**東西一百五十里南北一百六十里**東**至常州宜興縣界一十五里以葑埭牌爲界自界首至宜興縣七十里**西**至溧水縣界八十五里以三塔墩爲界自界至溧水縣四十里**南**至廣德軍界七十里以石屋山分流爲界自界首至廣德軍八十里**北**至金壇縣界八十里以長塘湖港荻場爲界自界首至金

壇縣四十里**東南**到宜興縣界八十里以白塔山爲界自界首到宜興縣四十里**西南**到宣城縣界一百二十里以湖東北岸爲界自界首到宣城縣一百三十里**東北**到宜興縣界四十五里以五家村爲界自界首到宜興縣六十五里**西北**到溧水縣界七十五里以曹山陸路爲界自界首到溧水縣四十五里

景定建康志卷之十五